

進賢縣志卷二十四

藝文

宋樂史撰太平寰宇記祝穆撰方輿勝覽于詩賦序記所載繁多後之人踵而因之說者謂地志之失古法自二書始然久而成例無庸變也今以序記諸文附于各條之下以便觀覽而以舊序與詩編入藝文不獨可以見情事原委亦足爲增勝山川游情藝苑之一助云

藝文

舊序

明成化年修進賢縣志序

王一夔

邑有志其猶家有譜哉家無譜宗派焉分合昭穆焉次序族屬



焉威疎流寓遷徙之遙遙者奚所考邑無志山川焉形勝風俗
焉媿惡疆域焉險易人物名宦之卓卓者奚所徵然則烏可以
無志進賢爲豫章壯邑西南昌南臨川北東餘干延袤凡數百
里志雖故有而紀載之體繁簡之宜去取之公觀者不能無憾
乃成化四年典史維揚孫貴邦瑞政暇因取而修之繁以芟脫
以補說以正人物名宦非卓卓有聲者悉擯不錄不數月櫟栝
而就緒君子試一覽焉匪獨數百里之山川土俗疆域瞭然日
中且於其所紀人物之超邁名宦之彰著者高山景行之念必
慨然以興而務企及之其有益將來功豈淺哉此其視世之爲
政簿書期會之急而於此不少畱心者不亦難得歟邦瑞介予
友上舍陶節彥符徵文以弁諸首予嘉之不辭而爲之書

正德年修進賢縣志序

談一鳳

進賢縣故無志提學先生關中李公謂一鳳曰斯志也乃試修
之志成會先生按縣至進賢取之筆削焉已令鐫板以行一鳳
竊嘆曰夫余乃今知作志之難也夫志史之流也不工於文而
其事備不專於事而其義存故事者貴覈者也義者貴精者也
事不覈則治體有妨義不精則於教無補妨體而棄教則無以
垂久遠而昭鑒戒二者史之所大忌也史猶不可況於志夫今
乃知作志之難也且覈事者未有不稽之衆者也精義者必義
者而後精也一鳳始爲志也考載籍咨父老推究形勢尋繹脉

絡仰觀星野旁訂文獻萃士羣講蓋三閱月而後志成然其義多昧昧斯繁繁斯雜先生曰夫約以該博史之義故書其大則小者可知也書其異則同者可見也故書其善則惡者戒書其得則失者彰此互見之義也互見則例可不繁一鳳復竊嘆曰余於是又知道之貴約也道約則義精義精則鑒戒昭鑒戒昭則久遠可垂也故曰春秋之例簡以嚴雖然是道也豈惟志哉豈惟志哉一鳳謹叙

正德年修進賢縣志序

楊二和

或有問於予曰子修志乎予應之曰邑故有志成化戊子者志矣弗詳也正德辛未者詳矣猶遺也識者憾焉憾之者誰乎邑

大夫欽靜劉侯簡自德興視篆初索觀之喟然曰一邑之典章文物夫可遺哉顧民事方殷旣逾年噓枯濡涸剔蠹鋤梗民乃大裕爰率其丞彭君德輝同教堯君廷璧訪予石灘草堂謬屬筆焉予早羸且痲竊不自揆亦欲表章先哲三辭不獲命乃試修之修之奈何曰先儒廣漢張子論志不可不重人物而官守又民生休戚焉繫故表之編年俾國家世祚而豈之豐嗇才之臧否一覽可悉也他如山川鄉都之屬則繫於地理貢賦物產之屬則繫於食貨凡有切於民事者則統曰水利有役於民力者則統曰建設地封任子恩典也而旌義榮身之例得附焉廟壇祠壝祀典也而寺若觀之祝釐得以類焉且予奪僉以輿議

而侯與鄉衮希庵萬公程度具張得取正焉然文獻委於劫灰
要之亦未足爲全志也志修矣亦有資於理乎先哲凋謝典刑
日遠志世道者一展閱焉可以省而鑒可以忻而戚民物故登
也而耗焉風俗故淳也而澆焉人材故昌也而替焉前政故良
也而莫繼焉惟治哉生聚於斯庠序於斯有弗感發而興惕者
耶則侯之憾之屬之汲汲者厥惟旨哉

正德年修進賢縣志序

萬鏜

邑大夫古鄆劉侯以治行調自德興期有月間披邑志喟然曰
是弗邑稱吾責也乃屬鄉先進提學楊公修之增撫刪潤再歷
時成書而余適省覲歸侯來言曰志就列矣幸序以傳余惟古

者受塵有相勞之義雖不文惡乎辭維昔史法莫備於成周周
禮誦訓道方志以詔觀事又外史掌四方之志小史掌邦國之
志自後班固作漢書志律歷之類晉人陳壽紀三國事亦以志
各我明有一統志藩省府州縣各有分志一統志之成甲子今
垂周矣熙洽之餘文物益盛必將有續焉能無取於省府州縣
之志乎而他時修史吾又知一統志之必在所取也推本究極
茲志固有裨乎史者匪獨吾邑存故實翼政教而已史志雖各
爲體而其法貴嚴義貴精詞貴約而達事貴核而無遺大要則
同然史有專職有常局有衆長可集有圖籍可稽有予奪之權
可執以茲所處較之何如人孰不曰史之重作史之難也而志

亦詎可輕視而易爲之哉侯能知所重楊公克任其難志之成不苟然也嗚呼邑志有刻今凡三矣三者天道奇偶之數成焉志自此其爲不刊之典乎而侯政裕人和乃推其餘力及此異乎時誦舉羸者先儒謂時措從宜爲春秋與旨余故表之以廣志之義且告夫嗣是者焉

嘉靖年修進賢縣志序

傅炯

今之邑有志猶古之有史也馬遷詳於記班固詳於制惟夫子作春秋其義始備然春秋之筆非後學所敢擬議而竊取法焉亦可也邑舊有志採摭未備邑侯南津程君覽之竊有病焉旣而石南葉公臨郡欲得邑志以便觀採侯屬掌學兩峯李君同

諸庠彥補輯成帙以呈然猶未備也癸亥之春侯績滿三載士人以旌召相慶而侯且恬然以修志謀於予予曰修志非史筆不可也今翰林大疇萬君內艱居家旣禫矣少參栢亭汪君早年儲養史館者也邑之志能無賴兩賢之筆乎侯乃禮請聚修凡三越月而書成門分類列釐爲八卷於凡山川建置風俗人物田賦典禮遺跡之類一展卷舉在目中且各於類立有言焉庶使覽者知其孰也美孰也疵孰也可因孰也可革孰也爲當法孰也爲當懲勸戒之義昭示於後後之續志者寧不因是而益加儆耶予善斯志無忝古史而有春秋之遺意也遂速匠刻之

崇正年修進賢縣志序

劉洪謨

大明一統志采自諸藩藩采之郡郡采之州州采之邑邑采之隅里原隰異土沃瘠異宜水旱偏憂盜賊隱伏關係民生休戚於此弗詳至吏治疎濶民患狼狽而後謀之故老呼藥何及矧後紀文獻亦多闕漏如余令嚴建日閱嚴郡志尚未知陳北溪先生流寓嚴陵所謂嚴陵講義四篇大文字裨益吾道迨守漳日始知之以告嚴紳則又未卜補入否我鍾陵志始於成化戊子兩修於正德辛未戊寅間及嘉靖癸亥萬宗伯修之余孤陋弗及詳適今丙寅丁卯諸紳家食之會陳給諫岵月金太守九如實手編摩邑侯鉞行廣布士紳廣布必廣勸如風俗昔淳繼自今

何以居沖守璞去泰損雕行誼昔端繼自今何以敬小慎微稟道毓德勛業昔灼繼自今何以尊主庇民含英發絢廉節昔崇繼自今何以儀天聳幹耀日爭光各有肺肝亮不煩祝此日召杜跨巽揚風懸離掣電亦不煩告也後接軫頰臨者當下車初首披茲志如某某慈仁廉謹去思晶晶今豈非昔何以紹之某某文行忠節孤懸皎皎今豈乏人何以培之利孰當興如志中某利某興然今將安興不至擾及雞豚弊孰當革如志中某弊某革然今將安革不至受搖左右此亦萬目瞻萬心祝者余自戊子以來觀南昌府志者二一出范休寧公祖手一出盧莆田公祖手張新建師序曰譬之爲命一草創之一舉討論修飾潤

進賢縣志 卷二
色而身任之鍾陵茲志如千卷其實兼四美乎斷於載籍故實靡所遺漏萬一有之蒐以異日則後之廣今亦猶今之廣昔無容瞻顧者忻逢改元聖主英裁特炳世道倏更積憤彈冠忠智應運翱翔一時羽儀百代異時志載此爲左券云

崇正年修進賢縣志序

陳良訓

道二出處已矣出則拾遺補闕探四方事入告明廷臣子分也處則稽往俟來徵一鄉事存之故實處士義也前後遞承鄉國遞積不出戶知天下語其理耳志者志其事則未有不先窺四域而遽言寥廓者予所以弗揣而妄臆茲役也予進不腆然景員環抱人文輩出明興志進賢者四而世廟癸亥以後志無稽

焉六十載簡編堙蕪若夢若覺日月循環今又一甲子嗟乎此亦鍾陵大缺事而學士薦紳家所不容已也予曩備使署署最富圖籍二三兄弟皇華越國得郡邑志必歸守府予慨慕斯役久之已讀禮又待罪瑣垣燹廟四年譴歸遭乙丑丙丁之間逆璫薰灼羅織士大夫動以文字筆墨爲阱予自是扃戶塞兌穎楮俱謝故弗逮耳丁卯八月以後秦道旋回星日漸朗一時在朝在家並可明目張膽證嚮論議於是里食君子僉曰修志其時乎紀一邑因紀世局之治而亂亂而治雖一日亦千古雖一邑亦天下也而予駢淺勤編摩以備草創邑大令蔣侯暨諸君子遂命屬鐫第事惟存實語不溢文稽其履而東西南北畫矣

察其氣則剛柔燥濕從矣凡習尚貢賦建置秩祀厚生利用吐
藻勵修一一條具臚列客有過鍾陵問焉展卷而如行其地如
覩其人也雖然志成矣予所喜者鍾陵山川聳秀士生其閭饒
負聰明介特沈毅勇敢之性而又代有名長吏躬先道化講率
坊表故凡在仕籍昂昂鬚眉矜名節而重建樹修文誼而甘澹
約遇國家大事不逐羶不畏鱗此道旁魄蒸塞流轉進邑自宋
迄今士大夫相守未壞也余與諸君子約願言千秋共存古意
出爲名世處爲眞儒進其永有榮遇焉若余不肖天下事久以
待後之乘風奮翼者矣而忽拜綸召旦暮殫竭芻蕘矢猶本色
此物此志無二道也書爲序

崇正戊辰修進賢縣志序

金廷璧

自班固易司馬遷入書爲十志志固史一體也今郡邑志其名
沿於固其義例實備諸史以志地則夏之禹貢姬公之職方以
志人則遷之世家列傳年表以志事若言則左邱明之春秋傳
國語匪才識學兼長烏能勝其任而愉快我國家治平日久文
章寢盛郡邑什九有志然而不究志所繇病則未知志所繇得
何者才情具矣而縱心孤異者有之識力短矣而安心故常者
有之俶俵靡從若宣務山亢仇城吳臺鵠長安薺則譌也栖栖
學步若盲師鼓唱村婦踏歌則猥也至若膠東增戶口子虛亡
是烏有相詡則幾於誕矣若曹邱游揚甘陵分部則幾於偏矣

凡若此類皆志病也考吾進志嘉隆以前經先輩創述者凡四嗣是六七十載文獻缺焉不備當事者懼焉因多梁侯政暇之餘惓惓留意業已與吾黨有成謀矣旋以艱去屬學博達吾李君檄諸生具草然而人各領款分編卷帙散漫未嘗參會歸於一致暨聞鐘湖蔣侯自東汝調至銳志以畢斯役爲快而年友陳式甫喟然曰築舍道旁終無成日抑亦吾輩之羞也慨以身任討論之責閔拉余爲商度而余時以釋吉北征未能供朝夕之役一切修飾潤色俱式甫爲政大都舊志所不收或收而失實或訛而相冒或混而無別或析而無當者悉釐之如時政利病因革有關國計民生者則必詳如疆域星野山川古蹟邱墓

故志所遺及昔存而今廢者則必書如名宦鄉賢諸人品故所沈寘失收抑在後進者非輿論僉諧則不登如典禮始末訛舛莫正寺觀故址沒於草莽者則必參覈備紀藝文非雅馴及有關風教者則不錄庶幾無前數者之病焉詞約而該事詳而核義正而嚴可以言述亦可以言作可以言志亦可以言史從此吾黨立德立功立言者有所仰止而吏茲土者觀土風以驗隆汙察民情以酌政令按往事以備法戒因時損益之得其所爲志卽得其所爲政矣故觀於一邑而天下郡國可觸類而知也吾輩權非袞鉞職存掌故司馬子長所謂整齊故事以俟後之君子者庶在茲乎

康熙年修進賢縣志序

聶當世

今天下治化之涵濡既久文章之氣運聿新會在廷冢輔議徵千載之典籍緝當代之闕遺一統志用以光贊邳理彰鉅典也聖天子曰可於是制撫暨藩臬各上憲下教郡州縣長吏悉覈所部幅員風土租絲官師文物彙爲書上之而余以黥淺承乏鍾陵曩已酉歲曾蒐輯舊乘守藏史委諸劫灰又造請邑縉紳士而議多盈廷謀同作舍蓋數年而未克畢斯役亦數年而不敢稍釋諸懷也爰訪諸旦評酌以夙契擇可委以事者若陳祥符丞時懋江明經墨饒明經植章文學兆瑞等各協心并力操筆墨以從求成化正德時孫尉貴談廣文一鳳志無從睹焉嗣得嘉靖萬少宗伯浩崇正陳中丞良訓各所修志又得熊部郎人霖所手集未刻進乘存稿既登舊章因輯近事憲惇史於執爵之醕問稗官於齊諧之言部分裒益罔臆罔漏總惟

昭代憲章是式又閔衷以南昌府志與江西通志閱數月而編次定再閱數月而剞劂竣迺得藉手觀盛事之成則凡志所由修與修之所以爲利一邑者請得而昌言之矣蓋志猶史也然史所指歸存予奪是非雖囊括函夏究非重鉅不錄故其義遠而該簡而有直體志則存累代之故實垂不刊之令典大而方輿封井人文政績節烈勲名雉堞蠻序小而里道津梁物產土俗嘉言逸行奇蹤異術例得旁搜博記補史所不逮其以宏訓

進賢縣志 卷三十四
保治殆如射者之的乎是則是傲在茲矣御者之前車乎是懲是愆亦在茲矣倘或令斯土者問坂章之廣狹土宜之沃瘠則壤之輕重政治之臧否風化之儉奢水利儲積之廢置德行事業之絢爛高士逸民之名氏而不知也豈特左史所恥承祚所非抑亦備官之道實有闕歟況進所錫履視古諸侯近承省轄觀天之文則長沙旁垂象章章有光至唐武德實始受名歷宋元以迄有明之季盛極而際衰矣幸值我

世祖皇帝應天定鼎乙酉

王師廓清豫章則茲土首入版圖幸脫湯火士弦歌而民樂利上御極歲星且周德化彌洽文教誕敷進固豫章之巖邑也而

文獻亡徵紀載弗備其何以對揚

丕烈遐暢

皇靈哉故是志聿成攷輿地而知維天垂曜斗呈其形流峙奠位地效其靈物力之蕃息曷滋而羸習尚之浸蕩孰軌於經覽建置而知有明之初維津維梁迺墉迺壑官署有章文廟孔碩若亭若臺若壇若壝節地力以紓之務斯擴和大勞以逸之民是若稽賦役而知厥田惟中申惟下下厥賦惟上上錯而且戶口有征稅糧有征徭役有征以莫不作絀而取盈緩而移急其曷以蘇民瘼闕典禮而知維辟奉天維王定制率土共凜尊親軌物乃爲世礪核典祀而知聖教鼓鐘胡不煌煌傍及有德亦

進賢縣志 卷十四
二
廁宮墻下至寓賢無缺烝嘗鑒職官與良吏而知棠蔭垂奕葉
之慕遺愛興與人之歌其人如何其政如何其後之思亦如何
溯選舉與人物而知鳳凰鳴矣翹翹其羽以功以節孰爲其伍
女德士貞亦實世補鏡雜錄而知災異必謹遺蹟必登佚事之
有係於民生必述藝詠之有關於名勝必增凡若此者綱舉目
張條分縷晰井井秩秩郁郁晶晶一代之令典數百年之故實
一展卷而炳如也燦如也耀
皇靈而制治恢

帝訓以奠封志也而史矣而竊有慮者風俗觀王道之成進素
習樸茂說禮樂而敦詩書故前志曰民率忠朴士高節概風候
近馴金矢鮮入今則寢失其初矣雖鄉黨自好者不乏而簞盞
不飭箕帚詬誶辱人賤行者所在皆有則防範之宜豫也禮教
之宜講也此所冀於進者一也貢賦爲國家之重務進緣僞漢
陳友諒怒南昌爲元堅守卽以民租制糧較宋元舊額實逾三
倍故一邑之維正竟與九江郡等且進土視他邑倍瘠甌窶者
禽饗之汙邪者草宅之如田腴遇歲每畝課穀入不越十餘斗
七八斗五六斗止耳其磽确而無年反是若額賦則以十畝餘
科糧一石是則盡土之毛不足供有定之額追呼能保其不逋
乎丁壯能保其不棄產而逃乎磬磬鴻鴈何以策之此所患於
進者又一也所賴方今

聖天子敦本崇治廣厲師儒而猶切饑溺由己之思上憲嘉惠元元計久安圖長治海隅日出一道同風業已登春臺遊化日終不令進獨向隅耳乃客有造余者曰是志也成進大觀固具是矣雖然邑之人而既衆矣後先湮沒之材良能必其搜採不遺乎卽罔遺矣而未厭覬覦之私烏能箝訾議之舌悠悠邱里不自昔難諧也耶予曰否否天下所不可執者私也可執者公也曩鄧文潔序郡志曰無所以不朽志無益也有所以不朽不志無損也此明於公私之說也況聖德含宏治理洋溢秉彝之在人三代之直道未泯也孰敢有逞其臆漏以紊我

昭代之憲章也者書曰無偏無黨王道蕩蕩無黨無偏王道平平其今日之謂乎獨我下吏治行碌碌蒙貿寡文欲以是上應聖天子之明詔併副各上憲督率勤求之至意不知有當芻採焉否也殊深踖踏云殊深踖踏云時同修教諭謝與成邑人副使饒宇栻貢生陳時懋生員章兆瑞江墨饒植

進賢縣今改歸原題而姑載其詩仍舊

次石頭驛

韓愈

憑高迴馬首一望豫章城人由戀德泣馬亦別羣鳴寒日夕如
照江風遠漸平默然都不語應識此時情

除夜宿石頭驛

戴叔倫

旅館誰相問寒燈獨可親一年將盡夜萬里未歸人寥落悲前
事支離笑此身愁顏與衰鬢明日又逢春

越溪村居

戴叔倫

年來為客寄禪扉多話貧居在翠微黃鳥數聲催柳變青溪一
路踏花歸空林野寺經過少落日深山伴侶稀負米到家春未

盡風蘿閑掃釣魚磯

越溪即棲賢山潤溪越溪皆戴公不忘潤州之意

海智寺

白玉蟾

山色凝雲翠萬重鳥聲啼落夕陽紅懶攜琴去彈秋月且撥棋
來着晚風幾度醉眠知事少一番吟暢覺心空慷庵僧號不與人
相喻閒上柴門滋味濃

宋

崇因寺

晏殊

蕭寺林巒近水村卓然幽境畫難分捲簾山色眼前有入夜濤
聲枕上聞苔徑雨餘堆落葉石樓風靜鎖閒雲更期他日重遊
處白馬紅纓頓出羣

謝程鉅夫薦引

吳仲軒

抱疾經年久何期徵詔臨芸窗書已蠹竹徑葉尤深空返皇華使難忘鷗鳥心懷君雖感激衰鬢不勝簪

彭蠡湖

余靖

彭蠡古來險湯湯過侯衛源長雲共浮望極天無際傳聞五月交茲時一陰至颶風生海隅餘力千里噎萬竅爭怒號驚濤得狂勢湧恐楚山拔聲疑夏鼎沸妖蜃吐濃煙層臺誇壯麗奔雷鳴大車連鼓聲粗厲豈識陰陽爭長憂天地閉孤舟一葉輕飄如旂在綴所以泝浴人未嘗貪旣濟逆猶上坂途順比飛鴻翅直待浮雲收乾坤廓然霽湖光百里平波色連天翠然後湧蘭櫂以避蛟龍害進退甘遲留克保無祇悔我願修身者體此操舟態動靜惟時幾畏慎存纖芥跬足雖平易盡心防曖昧長如履險時終身不危殆

望夫嶺

王安石

藁砧不記大刀頭化作峯頭石也愁豈有心情管風雨向人彈淚繞天流

趙鋪松林

王安石

破店誰相伴疎林對作行捲鱗乾不脫落子拆猶香聲攬三更夢陰和片月涼吾廬萬株碧回首暮蒼蒼

過潤陂市

朱子

進賢縣志 卷三十五
我行欲安適莽莽窮山陂晨裝遠林表午憩通川湄曠望思慈
親行役嗟吾兒喟然陟屺嘆歸心浩無涯曉霜徒御寒暮雨朋
儕悲前程諒非遠無爲苦愁思

夜宿進賢

朱子

白日照寒埜緬然千里平馳暉一以沒浩蕩驚飈生露彩林表
見月華波上明同行魯狂士思發商歌聲洗耳金石奏信知塵
慮輕

進賢道中

朱子

往辭湘水曲今過豫章城改歲無多日到家纔幾程晝憐春意
迫夜喜月華清此去無淹軌郊途似掌平

過澗陂日晴可喜暮復雨伯宗有詩因次其韻

朱子

客裏歲云暮我心殊未平悠悠惜往日鬱鬱懷平生況復久陰
雨喜茲霜曉明那知不終日又作瀟瀟聲坐厭泥途辱空嗟鴻
雁輕

北谷六十韻

羅必元

維北有谷在源之窮夾之兩山藏雲其中左麓右抱水流無踪
遠嶺前陳近水壘重賓而揖之惟南獨雄爰作書堂匪庠匪穹
羅氏之子於焉春容前爲魚湖萬尾喁喁中爲蓮蕩亭亭白紅
後爲橘洲佳楨叢叢南窩種茶桑芋衡從中窩種竹觀雷聽風

通賢集卷之三
北窩種梅月淡霜濃其木維何槐柏杉松其草維何蘭蘆萱豐
其菓維何桃李梨桐其菜維何瓜韭薤菘酒不待沽以水爲供
堂不待扃以雲爲封燕鶯蛙蟬絲竹笙鏞鶴鸛鷺鷗曹輩儕儂
環以楊柳錯以芙蓉醪醑金沙隱映昌丰無日不遊南北西東
無時不遊春夏秋冬絕嶺之亭可眺廬峯臨水之亭可瞰魚龍
可以挾舟可以攜筇可哦詩歌可倒罍鐘于以自樂亦人之同
或人嗤之谷名可攻天北一方幽陰之宮萬物僵槁生意何從
以是爲名昧昧其胸我曰不然子非盲聾覆載之內仁體混融
消息盈虛厥有始終天運自北造化溟濛水以一生五行所宗
木葉歸根夔蛇蟄蟲微陽潛機大化積功旣屈則伸脈流氣豐
發生非吉肅殺非凶何曾斷續有替有隆默探此理靜返吾躬
谷中有仁其體雍雍仁中有天其理庸庸我名元善我字亨通
名之爲元卽仁所鍾元之爲亨乃時之逢元在吾身造化爲工
仁在吾身天下爲公退而入谷吾體之慵進而軒裳吾仁之恭
室家吾獨鄉黨吾崇郡縣吾細朝廷吾洪樂吾兄弟吾谷邕邕
增吾朋友吾谷烘烘割鷄飯母吾爲茅容出乘小車吾爲邵雍
匪仁則私匪賢則蒙谷乎神乎尚啟吾衷

北谷

西山之間有長川川尾有屋纔數椽屋前屋後環以竹望之見
竹不見屋其中一徑分三蹊入門脚底高復低一蹊直透書堂

裏三步栽桃五步李一蹊斜落川之濱知魚亭下波汙汙前行
橫度橘洲上雜花間之爲步障橘洲甚小曲折多洲南下瞰知
魚坡欲撐釣船惡搖蕩縛竹爲之名竹舫不篙不纜岸不移安
坐而致江湖姿江湖廣漠病岑寂此地憧憧往來迹更飛曲沼
水紅橋橋上青蔥遠山色自橋而北北而西有室曰壑吾專之
半山未能與衆樂何用擾擾多驚疑專壑之西老松七布石爲
坐可十客松風颼颼客對碁茗寒酒冷日也夕又從松下轉一
蹊駸駸南向江梅枝梅繁嶺峻月不夜上有亭名駕香者洛陽
園裏如掌平安得梅高風在下駕香而上棲雲烟屹然更好山
之巔脚力已盡眼不盡行人舉頭如登天西山縹緲亦近爾康
廬不知幾千里谷中之實聊自紀清泉漱石相終始

永福寺

陶夢桂

寺占吾鄉好處山半新半舊屋千間水中蓮似禪心淨雨後雲
如吟興閒石路教人修整過芒鞋怕我往來艱夜深火炬渾無
用長是天教月送還

重遊永福寺

陶夢桂

二十年來不入山重來疑是夢魂閒薰爐已冷燈猶在經卷纔
收僧自閒寂寂禪關人罕到茫茫俗世事多艱竭來細說無生
話穩坐蒲團不忍還

能仁寺

鄒浩

八年之中三往回道人一意金石開非干桑梓有分好自是針
水無嫌猜焚香說了四句偈攜手直上千尺臺洞庭青草不我
隔東湖可歸歸去來

定香寺

汪藻學士

雨痕狼籍龍挂虛風林岑蔚鳥哺雛一川窈窕水雲國百家世
世封樵漁鐘來木杪知有寺杖藜起踏蒼煙孤溪山清明攪楚
尾臺殿屯剝存唐餘

宰餘千俸薄食米不給嘗還家售北谷中竹以自助

羅必元

宰邑歸來賣竹林逼人婚嫁太駸駸此君似笑爲官拙爲爾捐
軀抵俸金

旣比歲無笋又以詩笑

羅必元

此君似怨斧斤侵三載全無笋補林從此儘教窮到骨不將青

玉換黃金

菱塘鋪

楊萬里

白酒頻斟當啜茶何妨一醉野人家據鞍人向江頭望落日天
風雁字斜

元

湖亭酌別

吳澄

載酒崇穀集短亭紛紛歌吹鬧離情經傳性理誰堪託世濟功

進賢縣志 卷三十五
名我未成楊柳風前金片碎芙蓉露下玉團清放舟今夜蘆溇
口直到武陽天未明

訪朱志同與可堂

虞 揭

何處是真村深居穩閉門花閉惟臥虎石上更啼猿今古書千
卷黃精酒一樽城中足車馬此興與誰論

前題

楊仲宏

深居魏亭北惘惘自無華風俗似太古生涯如小家飲醇猶恐
過衣褐尚疑奢却與鄰人異詩書知五車

前題

范德機

地偏門徑僻塵迹少來過客至汗尊飲人傳擊壤歌引泉時剖
竹補屋自牽蘿但願無餘事年豐稔黍多

前題

揭傒斯

郭外多佳趣深居肯構成垂蘿繫小圃修竹映前楹雲度虛窻
白泉通碧沼清居人淡忘世有夢到蓬瀛

軍湖書院楊仲宏范德機避亂於此聯句

五日湖光看未厭楊再看五日可周全紹祖衣冠榮耀無千載

道義交遊有百年范佳會不常詩似錦紹祖盛筵難再酒如泉

明年此日遊何處誰在花陰共月眠楊

北山

伯顏子中

平川楊柳翠依微暖日遊絲掛綠扉啼鳥不知江國變多情到

處勸人歸

過故居有感

宅在北山二十八都顏山

伯顏子中

白頭歸故里荒草沒柴門鄉舊猶相見兒童且不存忠清千古事骨肉一家魂痛哭松楸下雲愁白日昏

七哀詩

伯顏子中

有客有客何纍纍國破家亡無所歸荒村獨樹一茅屋終夜泣血知者誰燕雲茫茫幾萬里羽翮斃盡孤飛遲嗚呼我生兮亂中邁不自我先兮不自我後

我祖我父金月精高曾累世皆簪纓歲維丁卯兮吾以生於赫當代何休明讀書願繼祖父聲頭白今日俱無成我思永訣非沽名生死順逆由中情神之聽之和且平嗚呼祖考兮俯馮假籩豆失薦兮我之責

我母我母何不辰復我鞠我何辛勤母兮淑善宜壽考兒不良兮負母身殺維新兮酒既醇我母試享無悲辛嗚呼母兮母兮無遠適相會黃泉在今夕

我師我師心休休教我育我靡不周四舉濫叨感師德十年苟活貽師羞酒既陳兮師戾止一觴我奠涕泗流嗚呼我師兮無我惡舍生取義未遲暮

我友我友全公海公愛我愛我兮人誰與同惟公高節兮寰宇其空百戰一死兮偉哉英雄嗚呼我公我公兮斯酒斯酌我魂

我魄兮惟公是託

我子我子嬌且痴去住存亡兮予莫汝知汝既死兮骨當朽汝苟活兮終來歸嗚呼汝長兮毋我議父不慈兮時不利

鳩兮鳩兮置汝已十年汝不違兮汝心斯堅用汝今日兮人誰我冤一觴進汝兮神魂安然嗚呼鳩兮果不我誤骨速朽兮肉速腐

學士朱善七哀詩跋畧吾謂子中之死可比齊之王蠋何則蠋與子中俱退耕於野矣樂毅之使不至蠋固可以不死蠋之死由毅促之也沈氏之使不至子中固不死子中之死由沈氏促之也齊有王蠋之死而後齊之臣子皆懷忠憤之心勵必報之志此田單復齊之機也若子中之死雖無補於興廢然風俗之頽久矣聞子中之風者亦豈不足以敦薄起懦而增人倫之重哉宜傳其事以爲忠孝勸

明

北山入景

熊明遇

河橋春漲帶平川芳草晴楊水澤天鴛鷺不驚漁唱晚蛟龍時伴釣竿眠青雲有色連丹嶂綠野無邊湧紫烟謾道橫舟須擊楫濟川功德藉先賢

官橋草綠

水國平夷此地高幾朝車馬問津勞兩湖日月三陽市千里雲山九派濤古岸人家開甲第新洲花草媚冠袍風光好在鷗鴻

外酣眼青霄一羽毛

青山古渡

沙堤天築汝河蟠迤邐岡原帶碧灘永望千帆湖淼淼山看數

點氣漫漫春迴曲港魚龍動夜宿芳洲雁鶩繁古樹畚高烟靄

裏松廬免擾一抔安

龍岐砂磧

古邱牢落宅羣真勝地千年野水濱燒燭却因漁火渡鳴榔還

與磬聲勻蒼虬駕去仙何住白鶴歸來井已涇剩有東風吹夜

浪湖塘深處長青蘋

鶴山丹井

父老傳聞古嘯臺寺連青果傍湖開將軍水戰樓船浪佛子焚

修浩劫灰一隴桑麻今是矣百年陵谷固然哉臺荒寺廢空懷

古徙倚平臯數落梅

青果嘯臺

蘆花洲上鼓逢逢祇為戈船賊寇通義士椎牛連野食丁男祭

馬護元戎烏啼花落江山舊暑去寒催日月同獨是陽侯貽害

久端憂漆室祝年豐

程埠更樓

千里通舟水草湄徼巡專設為關譏官衙午放看雲度兵子宵

征候月遲帆影翻飛吟楚鳥櫓聲搖斷唱吳兒茫茫大陸開芳

甸撫景躊躇故國思

龍川過艇

古木陰陰野澣傍河流日夜影如常蒼衣早看三春雨赤幟高

標九月霜渡子漿從烟裏蕩行人騎向水頭忙何須泛問津梁

路大樹林邊有濟航

羅渡高楓

漸嶺山

吳與弼

漠漠暮林橫綠野澄澄秋月映紅雲遠來客舸依沙岸獨犬一聲何處村

前題

章其志

漸山不與衆山羣一往高深慰所聞香引路迴花樹合聲通嶺
曲寺鐘分石泉邊坐晴飛雨古洞中行衣染雲折取寒梅新月
下孤懷曠曠欲誰云

麻山

侯復

芙蓉凌翠嶠洞府隱仙家玉倚三山樹春蒸千歲花風雲合日
畫神物護丹砂勾漏當時令登臨踏紫霞

前題

章袞

麻山今夕羽人家月色乘風入院斜披髮謾誇騎赤驥縱懷直
欲殺妖墓荒臺夜靜鶴常過古渡春深桃白花去住惺惺渾脫
灑絕憐銀漢泛靈槎

前題次韻

曾鈞

文星一夜聚仙家銀燭迎風半欲斜玉樹遠歸天際鶴金樽光
醉月中墓藥欄香雨生芝草池閣輕烟溼柳花笑問桃源在何
處謾從流水覓漁槎

前題

何祉

萬山迴合此山家翠嶺高峯閃日斜井口滙泉遺古蹟林中零
露吸金墓偏於勝算尋溪谷靜看浮光滾浪花話到忘懷塵想

絕憑虛直欲泛仙槎

前題

徐師川

沙岸委蛇白雲林迢遞青千山擁廬嶽百水會宮庭旅食猶能
飯叢祠更乞靈江湖萬里浪政爾一帆輕

望雲亭

朱夢炎

憑欄越溪上悵望流雲度遠水積長陰沿林引輕素如何天外
雨不洒江南樹萬里寸心遙蹉跎歲將暮

觀物亭

周光祖

琅玕秀劈參差玉曲市方塘半畝宮恰似瀟湘人去後低枝柔
向五更風

瑞蓮亭再植蓮有咏

蔣德瑗

閑對花前泛酒船碧筍佳種向堂傳他時看取香浮座莫羨紅
蕖映漢川

其二

松拂明星柳拂霞風舒翠蓋雨舒芽瑞亭聞道成佳話連理傳
來一樣葩

前題次韻

陳良訓

峯頭十丈大如船玉井於今萬古傳只此瑞亭堪白社常教蓮
幕映吳川

其二

綠蓋清波着紫霞
嬌粧淨拭試新芽
池開太液花千葉
疑是神仙植異葩

曉至鄔子驛

李夢陽

湖夜乘風過天明
見驛樓數家依獨樹
落月隱春洲日抱越峯
上江奔吳徼流桃源春水外
兵甲氣還浮

鄔子驛值風雨

徐師川

重湖浪正起支川
舟不行急雨復臥聽顛
風晝眠驚沾酒仍就
店買魚仍就罾豈猶爲吏卒亦足澆老生
烟含茅屋並竹籬斜
樹縈岸水衰未變寒林何遠聲
吳芮昔爲令英布法當黥自古
多羣盜于今猶戍兵

中秋舟次鄔子

李學會

風攬蘆花浪泊舟
短篷推月思悠悠
光涵萬里渾如畫
涼霽一天方半秋
盃酒未堪供我樂
寸心常只爲民憂
不知此夜閭閻下
幾處呻吟幾處謳

前題次韻

楊峻

公事江干繫一舟
中秋月上夜悠悠
倚篷賞玩非因酒
揮筆吟哦不爲秋
赤壁同遊蘇子樂
青霄獨立杜公憂
吾侯德政賢千古
路有童謠市有謳

鄔子驛

邵寶

咫尺鄔湖水相將
入楚鄉雨中帆力緩
風外笛聲長
夢啜山泉

茗吟焚海島香舊遊堪一憩何處有甘棠

南昌道

孫燧

外臺雪後一枝梅疎影橫斜伴月來索笑巡簷詩興動揚州此
日是誰栽

其二

公餘徙倚對寒梅一種清香入座來自是商家調鼎味何人借
向此中栽

按察分司

黃韶

一從身委帝王家事事含愁鬢易華有水難消心上火無風自
息眼中花杜陵老去詩堪誦陶令歸來酒用賒笑折芙蓉玩秋
色碧波千頃映烏紗

前題

林俊

烟波重阻白鷗家驛路星霜感物華兵革時繁陰帶梗簿書眼
冷黑看花孤舟短髮疎三請老馬長途事一賒圖畫昔年幾麟
閣歸雲天外薄于紗

其二

官舟曾得近漁郎烏白江清舊話長葭影直參鬢鬢亂茶聲微
送齒牙香苦遭臺務閑相縮翻坐人情老未涼好似間關還宿
債板橋重試馬蹄霜

前題

邵寶

進賢縣志 卷三十五
持節觀風教初程試進賢斯名非偶爾吾意亦欣然有石能隨地無香可告天江梅消息早今已爲君傳

玉嶺公館

吳之鵬

年來雅志在長林到此欣看翠葉森勁節不隨桑隕色清標真見歲寒心風生六月疑無暑景入三冬更覺陰豈是七賢今已往空留高館倚山岑

前題

沈奎

竹下留賓小築成坐來冉冉綠雲生誰將勁節裁斑管吹作朝陽第一聲

其二

戶外青山竹裏軒停驂此景共誰言何時得借良宵住半榻清風月一痕

其三

翠竹千竿一徑開玉山高處少塵埃庭前荆棘還須剪會有乘風彩鳳來

前題

何鏜

十載重過舊竹林川原彌望足蕭森當年頗費栽培力此日翻多保障心百里壺漿勤父老幾家烟火入山陰桑田却憶行春後謾有幽心對遠岑

初仕鍾陵過玉嶺

周光祖

進賢縣志 卷三十五 詩
取次紆迴扣石林庭前龍種亦森森風來兩袖收天籟色入三
秋護漢陰嬾媪正宜中散地清真偏傍子猷心徘徊仰止知誰
是寂歷鐘聲上暮岑

覲回再過玉嶺

周光祖

曾擅風流七隱林只今遺韻亦蕭森萊公到處千年祀剡水多
君百尺陰直道自鄰雲外侶清風賸有歲寒心會知肉食真無
味誓意東坡憩此岑

玉帶金魚十詠之一

呂聲

玉帶名橋天地久金魚名沼古今無祖龍鞭石成虛幻青鳥傳
書謾覬覦千尺虹霓橫碧落一天星斗煥清都中原麟鳳闕來
往不狎山谿鷗鷺雛

棲賢山歌

黃汝亨

我聞棲賢山右踞潤陂側折腰苦逢迎覲面未相識去年蒼崖
蔓秋草凌巖直上風蘿道半面荒餘一畝宮四週迴作青山抱
世人不解稱仙翁千載於今識戴公公將北固山前潤沁作西
江陂上功銀章墨綬百城長枕石漱流臥其上溪溪垂釣落珊
瑚樹樹披襟坐泱泱足不離山三十年樵歌漁唱相周旋袖中
挾有丹山訣筆下時飛白雪篇阮家仙源未爲誤武陵移入鍾
陵路棠蔭松影兩不磨人世浮雲何足駐吁嗟戴公安在哉風
流贏得小天台虛名競慕南州榻勝事爭傳帝子臺嗷嗷父老

無美惡于中欲起寓庸閣但言江山今古同那知戴公不可作
嗚呼桐鄉祠峴山淚昔人不留今不去曾使堯桀無定據我與
戴公等一寓胡爲皇皇欲何之惟有清溪碧山無恙長此住

棲賢山八景詩

黃汝亨

農郊晚唱

日出荷鋤來日入荷鋤去三唱詠而歸明月照疎樹

僧寺晨鐘

空山何所爲日高僧未起一聲破諸緣寂寥從此始

茶圃春雲

入山展茶經我愛陸鴻漸香風泛綠叢春雲齊片片

書臺夜月

古人不見我幸有竹書在明月照高臺相對映千載

筆峯聳翠

橫看紙學堂側看紙文筆何以萬丈長應有五色集

帶水送青

盈盈九曲水周遭縮衣帶四面碧山垂一一浮遠黛

寒沙泊鴈

江雲淨不流淒風嘯儔侶杳杳西北飛和雲泊沙渚

暖谷鳴鶯

窈窕山谷間忽然春風生何來笙簧奏噤噤啼鶯聲

前題八景

金廷璧

晝爾于田東復西夜歸聚樂共旄倪瓦盆盛酒歌聲沸贏得官

清歲稔時農郊晚唱

化城隱隱與峯連住寺齋心可是元漏盡起敲聲百八醒提塵

夢覓先天僧寺晨鐘

清明已過日遲遲正是山居得意時雀舌吐英雲吐彩物華天

寶更誰知茶圃春雲

傍水臨流一片磯幼公會此獨棲遲當時高節今猶在千載輪

光照舊絲書臺夜月

亭亭高插紫雲霄花若江淹入夢饒造化有情畱勝概至今文

物絢清朝筆峯雲翠

周環若束日潺潺清色怡人觸目間會到源頭渾是趣不勞淺

識更觀瀾帶水送青

北風淅淅暮江濱寒月蘆花幾處明嘹地一聲雲意澹倚樓人

目入青旻寒沙泊鴈

洞口春深日色融欣聞野鳥弄晴風天機到處堪宣洩半在無

情覘皖中暖谷鳴鶯

前題八景次韻

陳良訓

出舍樂餘閑日晚賦歸去一曲漫歌聲邊雲振林樹

山寺有華鯨旦旦催人起打破夢覺關善念孳孳始

茶圃得春先纖芽發以漸惟天生物心覆之雲一片
古有讀書臺臺上月長在入窻景玲瓏清光億萬載
江上數峯青卓然似文筆添得夢中花雲烟四時集
溪流漾碧天光橫玉一帶俯瞰只虛澄遙映遠山黛
嗷嗷霜裏羣大叫雲間侶月明何處飛息翰欣此渚
盤谷春光媚聚樂惟友生相彼遷喬鳥猶弄睨皖聲

過羅溪橋

左輔

張侯當日築堤功合與韋蘇事績同洪水橫流南北斷褰裳不
涉往來通烟開鼉背千尋碧日射龍鱗一溜紅却笑秦皇鞭海
石何曾三島架長虹

密都統廟

朱尚質

憶昔經過龍馬坪因問往時龍馬兵男兒死耳不苟屈鄙夫患
失皆蠅營吁嗟密佑真宋將以少爲多直爲壯豫章東上進賢
西嘶馬如雲塞平壤將軍決戰血成池重圍忽破雙刀揮軍殲
身脫將有爲但見追騎凌烟飛翻身追射仍奪馬至今父老猶
能詫有腰不佩虎符金有頸寧將血鋒赭漫漫大野際天蒼白
骨白眼明於霜陰風翻蒿狡兔穴行人不過生淒涼密公壯節
信無敵忠臣何必分南北當時稽首皆侯王獨寄荒祠鄰草木
民俗因循六十年豆籩不修香火寒觀風使臣日如水只有志
士空相憐知君弔古意無限一讀君詩三感歎君素曾從犬吠

堯賜官下詔光前傳

宿潤陂

韓雍

華屋新成駐繡鞍
嚴霜徹夜送清寒
枕邊忽聽更籌急
憂國憂民寢未安

和伯顏子中韻

朱夢炎

會折蟾宮第一花
西風吹袂向天涯
班生萬里空投筆
漢使三秋獨泛槎
朔漠離愁成白髮
南州鄉夢起清笳
歸來恥效梁江總
只傍青門學種瓜

自進賢趨撫州

李夢陽

炎域霜何厲
寒原水欲稀
肩輿隨落葉
晨日上征衣
路勢東南轉
北風鴻雁歸
東鄉新血戰
巢破鳥猶飛

使粵思親

季源

親庭拜別勤王事
屈指於今半載過
定省禮疎衷自歎
旨甘念切夢偏多
一心愛慕無終始
百歲光陰有幾何
料得榮歸春正好
稱觴戲綵樂天和

自武陽趨進賢

李夢陽

大宇流元化
生情互陰朗
積霖夜猶注
寒陽朝遽上
肅肅晦色斂
晶晶川水廣
楓林亦何赤
沙嶼鴻競往
涉河歷紆鬱
登嶺暫停鞅
撫江信縈帶
鍾陵氣閎敞
荆俗雜澆厚
徵賦則邦壤
佩刀豈民性
剪戮嗟幽枉

浮鄱湖

熊明遇

夏水當羨溢大浸吞南垠粘天三百里九派抹江脣吳楚浮杯
判乾坤一鏡分源通敷淺岸流接白華津清濁界針線溝鹵鍾
肥仁鎖柱縻龍子攸居來鴈臣草色陽渚外山根陰阪濱我曾
嘲海若從此笑番君

臧山崇真觀

黃汝亨

水樹涼風至清興在孤琴閣軒俯華沼仰見白雲岑采柏翠連
屋葺荷香滿襟諒非世俗好聊契古人心

和黃汝亨棲賢山八詠

熊人霖

農郊晚唱

日出東方明上田爭早去野鷄飛過田閒歌隱深樹

僧寺晨鐘

晨鐘呼寤言羲馭海中起爲善從聞修孳孳自此始

茶圃春雲

旋煮山巖茶碧煙浮以漸却笑古人癡未解天然片

書臺夜月

昔賢此讀書今大有書在萬竹走龍蛇淋漓如記載

筆峯聳翠

廉貞案上山造物兒時筆知是草元文時時白鳳集

帶水送青

不見督郵久忘腰應適帶却憐如帶水情勻浮遠黛

寒沙泊鴈

飛度千門雪來爲野客侶忘機日往還宛在水中渚

暖谷鳴鶯

小天台上樹日暖翠生生怕放劉郎去殷勤叫幾聲

人日村行

包希魯

谷暖鳥穿樹沙寒竹覆溪亂畦交野水殘雪動晴泥物色漸成
變人謀殊未齊孤懷有遠致此日計新題

宿土坊驛寄孔世長

徐師川

夜燒郊原百草荒敝裘朝去犯嚴霜殘年意象偏多感回首風
煙更異鄉往返自非名利役辛勤應見友朋傷章江猶得重遊
處最愛梅花蘸水香

鄔子驛阻風過章氏飲

熊明遇

家村平望近飛帆阻石尤潮隨新漲濶酒向故人畱鷄黍鄉風
古魚羹水國秋驛樓今夜夢沉醉咏仙遊

題衙齋

毛一瓚

退食放衙後心閒地亦偏蕭條如古寺寂寞似枯禪飯飽分塔
雀琴懸讓樹蟬折腰愁報稱終覺古人賢

由進賢之東鄉

熊明遇

邑屋鍾陵外筠松夾路青鳥棲鄉樹隱天濶暮雲停吳楚憂羣

盜東南候將星臨歧無限思惟取素心銘

北山

熊明遇

吾生湯沐里臨水亦稱山迴薄岡原迤高低壠隰環讀書登第
盛種稻歲收慳兵燹應無到平林曲水灣

其二

前階多名碩雲連甲第春粘天芳草碧而地綠楊新汗漫東坡
笑傳呼北里人敬恭桑與梓隨俗式親鄰

巢居

傅冠

夢酣心正遠睡淺願翻違得爾堪高枕爲巢傍釣磯漆園誰寄
傲槐國且忘機自喜風塵杳臨臯一振衣

文節祠成志喜

周光福

憐予不貯買山錢特構迎尸聞道先濂洛千年憂墜地鉢衣一
旦續中天鳳凰山畔儀堪羽日月湖分讖叶元北面如君皎法
五散容別乘廁狐禪

文明門落成

熊明遇

高閣崢嶸聳太清天開形勝甲山城曲江春雨龍鱗動丹嶂朝
瞰鳳翥明俎豆千秋崇正學風流一代冠時英應知靈氣騰東
壁片片青雲日下生

白湖嶺

先君墓嶺北

熊明遇

白雲千里接江天縹緲層峯仙掌懸漠漠春陰開大陸霏霏秋

通賢集卷之五
色擁晴烟松廬佳氣瀛洲裏野壑幽光汝水前莫是洪崖仙子
路桃花飛撲打魚船

八字腦見新月

顏 竣

地形分八字天意繪娥眉掩映雲華亂飄搖舟影移草香新窈
窕風細遠透遲獨夜蟬娟入徘徊伴侶疑

由瑞洪望趙圩

熊明遇

洪塘放擢蠡湖邊一望烟波思渺然疎樹人家鄉社地滿川帆
櫓水涯天千羣野鶴滄洲遠幾陣征鴻碧草連北關鐘聲今夜
夢孤臣敢自歎連遭

玉版居

熊明遇

鍾陵城外綠森森種竹何人雨露深林入秋聲添鳳吹風搖夜
籟學龍吟高枝動與飛霞鬪遠籜斜將古樹侵莫向南陽誇召
杜後先封殖塞淵心

前題

鄧 漢

春畦一夜聲霖霖曉望千枝萬枝玉送堦出屋青幾尋開窻四
面來清陰有如王家佳子弟坐上觸目皆珍琳主人自是東南
美此君朗潤略相似吏散時復攜琴至落日瀟湘生遠思一官
罄折何足論要於林下存風氣

前題

吳士元

古寺連南郭幽居擅勝名孤雲猶自媚好鳥最多情樹杪銜殘

照巖光漏太清隨緣叅玉版此地有金聲

前題

樊良樞

孤寺枕高城幽居愜勝情林花團塹色竹韻漱泉聲拄頰朝逾爽銜懷夜正清野人非六逸于此足生平

其二

傲矣漆園吏超然玉版師衣冠予偃蹇杖履數追隨鳳吹生幽谷龍游自葛陂莫言無異政青扈亦相窺

其三

入林何必遠一徑足生涯夜冷聞天籟山空落雨花低枝籠翡翠修影顛龍蛇退院頻來此談經到法華

其四

蘭若諸天近淇園此地遊飛濤一夜雨寒玉半林秋卜築依元度裁詩擬惠休朱書自天吏故是霍陽侯

其五

竹砌夜蒼蒼翛然野趣長由來君子節還接令公香刻葉遲鐘漏飛花送酒觴山僧趺坐久松子落禪牀

前題

李開芳

何嫌車馬地種樹已成龍海鶴盤雲下佛奴出竹逢名香無別供午夜祇聞鐘莫是蘇劉者還來玉版重

其二

心遠市塵外淇園滿籜龍同時人共淡曠世味相逢叢密難窺
地雲濃獨和鐘百年三萬日斯遊不厭重

前題

有序

湯顯祖

蘇長公戲劉器之廉景寺燒笋曰此玉版師也令子一知
禪悅之味黃魯直最爲長公所知嗜此特甚豈非其風味
有入耶千載之後復有魯直則我鍾陵明府錢塘黃貞父
先生是已大雅清真無他嗜好而獨嗜與師遊得師於城
西南古寺而新之以亭予過之則秋九月夕也月露淒淒
風篁竹韻數爵之後出玉版師焉淡以腴溫以芳雖食瓊
截肪未足云其風趣也坐右之客厥惟孝廉李君迺始顧
師羶而笑曰惟予三人甘矣師得無苦乎師應曰苦實稱
名甘亦無口身根不立舌味何存予爲之粲然已而嘆曰
貞父君上計而迺始君亦且計偕食肉刺齒他日過而存
師者非予林下人耶相爲悵然遂長歌而送客

東坡老人何杜撰翠竹爲師叅玉版西湖有客如涪翁剪拭叢
林出青眼清齋肉食復何事蒼筤素封亦茲產含藏潤碧飽霜
露剝落熒黃映杯盞一時雅韻盈風聽百里心期隨折柬入饌
但聞蔬筍氣獨醒未厭江潭筦美人月出秋河靜高談夜入明
星皖此君風味動禪悅異日賓遊記山簡徘徊竹根焉所如今
夕粲者李麟初睠此明燈發幽色翛然玉佩臨前除望覺寒蟲

氣清切時聞宿鳥鳴蕭疎却憶明湖落烟艇暮風殘雪吹人裾
回頭揖別臺殿宵洗耳長如鐘磬餘恨此林亭隔秋水瀟湘竹
意空踟躕城北長雲渺千頃何不徙置滄浪居君言得此亦偶
耳且遠市郭藏烟墟君當高謁承明廬李郎將從奏子虛竹廚
盤礴那再得恨無與可畫筆南宮書

前題

錢希言

寂寂山齋裏悠然寡世氛卷簾觴夜月閣印鎖秋雲俗化聞絃
誦清風革舞文百城論吏治冠冕不如君

其二

載酒出城南邀歡落日酣仙才君不忝重客我猶慚竹靄微凝
露仙臆欲瀉嵐從來浚郊外常駐大夫驂

其三

相對蔭檀欒行廚薦玉槃入林看下鳥爲縣嘆栖鸞宦味雲俱
薄冰心月共寒立談吾豈有贈璧比琅玕

其四

山川淳朴處選勝此亭開不用催簫管偏宜弄酒杯鶴隨嵇駕
至馬送習池回他日羊公石何人洗綠苔

其五

五載著循良鳴琴不下堂邑宜稱十室木亦擅千章未換爲郎
綬空畱教子箱今宵故人共松際有清光

前題

陳邦瞻

見說鍾陵宰頻過玉版居
雨香深戶牖風影亂琴書
春野饒馴雉夜溪有棄魚
那妨恒嘯咏瀟酒學禪廬

前題

僧廣詢

小築依南寺城偏客少臨
幾行喬木徑千載故人心
野廓雲霞集窻虛水石陰
仙郎饒逸興花映給園金

其二

千里鍾陵信知君結構竒
吹門山色動溥竹露華滋
筍味誰先得秋風我後期
長江今夜月脈脈繫相思

前題

張位

操割遊刃間寄暢弄柔翰
取適同心賞斗牛夜增燦
名理時造微元尚渺雲漢
蒼巘借偕眺綠波俯從翫
托交形骸外超詣遊汗漫
時叅玉版師寓踪塵可盥
寄我天籟吟珠璣落霄眸
青飈時謾謾敲夏冰霜幹
身如坐雪堂梁月相與伴
快聞異等徵需次蓬萊觀
獻納任才賢借箸陳廟算
君去北斗高我歌南山粲
它時玉笋斑應憶甘棠讚

靈陽觀

包希魯

少年長在此中遊元髮因
循變白頭宇宙寥寥多少
事江山莽莽古今愁天迴
北斗黃鷄曉地轉西風白
雁秋意氣尚存筋力弱仲
宣何處可登樓

京師放還山中作

楊譽節

老向洪崖學采芝笠雲瓢雨伴青藜三朝鶴序聯班肅九度龍
顏面問竒豈爲丹砂貪邑令莫占紫氣費閔辭塵埃處處神仙
宅寄語畱侯漫作祠

其二

聖主昇平有道時野人何幸拜丹墀湖饒九曲何須乞雲滿三
臺足自怡獻壽權承鈞樂奏侍從得和豫遊詞薜蘿遙夜閔情
在見說深山有鶴隨

崇正二年仲冬宿潤陂僧法耀指引尋戴叔倫讀書處

熊明遇

隱士高踪不可尋鍾陵橋北潤溪深讀書堂上瀟瀟景秀句流
傳楓樹林

其二

弋陽西下楚江天彭蠡匡廬山水連驛路停車無限思林僧指
點到棲賢

棲賢寺

熊人霖

北山之北古餘千篁竹深深暮雨寒借問讀書臺上客月遊可
出舊衣冠

其二

先子周南護白雲廻翔鴻印楚江濱當年自紉營平老剩得鵲

啼野寺聞

龍山蓮湖

熊孟啟

錦雲千頃碧層層
午雨南來散鬱蒸
墮盡露華香未歇
不知身在玉壺冰

其二

枯槎可似木蘭橈
長狎詩囊共酒瓢
羨爾野棠甘寂寞
免從紅粉並嬌嬈

其三

輕陰涼月每經過
鴛水翻嫌點綴多
款乃一聲來隔浦
漁童未慣采菱歌

其四

那辨花香與葉香
輕紗白蛤水雲鄉
衣冠染盡芙蓉氣
懶覓前人製芰方

木綿花

舒芬

采采西風雪滿籃
禦寒功力倍春蠶
朱欄曲檻閒花卉
無補生靈空自慚

寫韻軒

朱夢炎

掌籍江河誤泄機
幾年謫降學書癡
晴窗滴露花搖席
午夜揮毫月滿帷
縮得春風畱鳳帶
畫殘秋水照蛾眉
從今了却人間事
一曲鸞簫跨虎吹

龍興郡侯安公衮德政詩

包希魯

我邦肅肅奠此南服藩之屏之公衮執玉糾之飭之繡斧朱轂
土有錯貢賦有米粟民旣繁夥法令易觸胥吏爲詭徒卒爲酷
毒痛我民心恫額感我侯戾止如昏斯旭如寒斯燠旣滌其煩
亦直其曲吏不忍瀆卒屏其足天降旱潦侯禱侯祝時暘昱昱
田有嘉穀野有孳蓄札瘥弗罹胎卵咸育翼翼千里化澤斯沐
維此下邑曰爲進賢實隸侯郡維侯仁廉樂侯之仁侯仁如淵
旣清其源惠澤益延我稼於田我賈於廛我誦我弦我飯我餽
我燕養老我祀奉先髫童娟娟黎首榛榛無瘠無捐無戾無愆
嬉於邱園維侯之恩

三德寺

吳璉

梵王宮殿澗之阿冒暑來遊馬一過騁隙光陰忙裏度愛民心
思老來多枝柯憔悴山前豆子粒稀疎隴上禾天意何勞苦如
此試將消息問彌陀

崇因寺次韻

羅倫

浮綠微茫水國村四天垂野地橫分元中僧語龍還聽夢裏鐘
聲鶴不聞野日祇今晞湛露大風終古淨浮雲來遊車馬應無
數只訝紅纓是出羣

能仁寺

汪集

徵士幽棲何處林堯城境僻愜禪心書聲未許蛙聲雜硯墨長

遺池墨深凰嶺孟盤雲翠疊虎溪環映竹松森結茅近得分閒
地習靜時來聽梵音

過徐橋口占

周光祖

千峯馳驟瑣危沙立馬遙看孺子家殘碣不隨高榻往悲砧猶
帶晚橋賒升沉古道驚時眼來往今人送暮鴉欲學羊曇揮永
涕那能解劍贈天涯

福勝寺玉版居

黃汝亨

偶無門庭喧步出城南隅披霧漸得嶺開雲遂升衢中有祇樹
林古木鬱以紆亭亭青琅玕玉立與衆殊小構成密陰靜嘯恣
所娛

忽忽白日速五載壇石長事事不如人此間有微尚空林澹何
求冷風起清唱峯前烟光霏松際霞氣上徙倚無定依葳蕤起
相向山僧罷逢迎我欲數來往

塵軌詎有塵禪扉亦何禪蓓蓓岩壑間此君足周旋佛火明空
翠鐘聲和疎煙炯炯衆鳥語時時經梵宣懶慢謝人理聊以代
歌絃

生平愛結客有酒常盈樽偃僂巖邑下蕭疎孟嘗門豈無湖海
豪清虛枉相存松下折玉版聊以充盤飧未足快人意素交夙
所敦

坡老妙禪喜啟予有器之攜手長林下叅承玉版師託根詎離

塵冲味了不緇漠漠元風揚濯濯清露滋潔然衆味餘冥契良在斯

福勝寺玉版居

鄧文明

南昌孝廉

爲訪蘭亭勝因過玉版居短牆清不斷修竹澹相於河漢秋雲薄窻櫺夜月虛祇應燒短燭飽讀壁間書漫訝山藏寺淇園一逕開雲深依古木露下滴蒼苔舊事心俱折新詩手自裁絕憐壇石長獨擅挾天才禪喜元同好相隨到上方勞君題小草對客供名香十五盂蘭會三千法寶莊塵談消永夕未許據胡床

福勝寺玉版居

曹學佺

閩人

宴分中散地贏得小淇名客到已諧趣公餘何獨情草幽苔欲雜林滿竹偏青坐久月明下時聞鐘磬聲

福勝寺玉版居

朱謀瑋

見說仙人館遙開霧嶺間金繩隱花嶼玉笈秘松關獨共素心賞寧容塵鞅攀年來苦相望何異隔蓬山

世外成香界宮中結淨因標題纔一畝形勝足千春竹樹饒風韻煙霞識性真不知星聚夜若箇是陳荀

爲訪蓮花漏因成玉版居攢峯開步障古木架精廬將客青霞上論文紫月餘一端蕭散意猶作換鷺書

鳴琴多暇日搗藻對清期吟嘯俱堪紀風流亦可師移將仲舉

揚絕勝習家池安得羸滕往從君一問奇

摩尼寺

山僧掃去白雲堆方丈軒深遠俗埃遲步稍防苔鏡滑謾畱偏
愛鳥笙吹茶因薄渴多貪碗酒爲煩蒸懶舉杯民瘼滿腔訊未
盡試將世界問如來

祖教寺

李學會

斗飄方丈雪一枕華山雲道外元無道人間別有人閨中談物
故靜處着衣巾名利紛紛客徒奔陌上塵

明心寺聯句

宗璽
羅中

出郭塵想滅入秋天氣清遠水看黯淡近山數分明螺髻挺秀

披露巾岸輕盈佳木零露垂啼蜚俟時鳴倦呼手几據吟並肩
輿行喝道殺風景尋僧愜平生忙假半日閑歡談千古情入門
聽梵語下馬聞鐘聲雲裡同歌笑人世幾廢興竹深鳥倒挂葉
墮猿虛驚莎堦臥獨犬花圩穿亂螢農收稿秭積雨足田疇平
愛此禪境寂忘却來路縈茶瓜飽兼味龍象呈雙形檀烟裊石
爐露柳垂淨瓶色空入道眼蔬笋逃詩評已說天花偈閑翻貝
葉經冥冥定初放瞳瞳日高撐俯視木交落仰盼松雙擎後彫
重孤節速化嗟枯莖勇徹法堂講固結詩壇盟願比鉛汞懷寧
使水火爭出門共遠舉秋高鸚連橫

白狐峯

饒鏡

一宿招提上塵緣此暫闕始知休歇念只在剎那間禪悅疑同
嘶元機妙獨刪鐘聞當警策莫待漏聲還

鐘山

高資

鐘陵舊號綠鐘得得處分明兩破間事貴有徵名貴雅破山應
合改鐘山

前題

陳棟

鐘陵舊號晉時聞鶴嶺鸞峯勢不羣王氣秦淮南更厭鼉鼉載
向厭原分

石泉

舒芬

涓流莫謂無餘潤江漢還看自此充只向惟微認堯舜唐虞事

業古今雄

萬曆己酉大水遇災詩四首

周光祖

虎豹當關不可聞少女浸淫益楚氛出谷慣興三里霧檄呈空
讓九年雲相看烟井珠愁粒獨有山城瘵屬君讀到皮毛無傳
處乾封草禪爲誰焚

髮爲憂民短病從逝水長簿書投寢閣城市渺滄桑獨足羊留
舞三過席未遑爭如輪晦晚鄭監有餘傷

桑戶綢三載箕疇忒五辰青山疑墜落白晝恍昏淪寂歷煙青
改蕭條雁鶩貧相將思禪竈何以崇驅鄰

地瘠慳刑馬山深慣窟蛟紛翻移蜀道混漭失秦嶠薄命侯非

骨攢眉令是庖日逢滄水使無計壘泥巢

國朝

壇石山

饒宇朴

壇石山前宿霧收菁葱取次出平疇峯涵零露青猶溼水擁晨
光碧漸流曉日棠梨看樹樹薰風稷稻望油油何緣更借西莊
筆淡寫垂楊月一鉤

前題

顏怡祖

日月湖開映玉壺澄流昨夜洗雲膚不知空際渾晴雨疑盡長
河或有無翠露幾條涼欲滴青峯數點澹猶疎微茫會入王維
畫似是壇山曉望圖

麻山

江墨

疊嶂屏森監星羅簇若朝俯窺常杳忽仰睇更岿巖崒無今
古昏明迥且宵棋叢湊作趾縷脈細分條谷合疑團壁坳平恍
度橋龍蛇徑又曲波浪伏還翹霧重峯全失雲輕嶺淡描夕陽
斜掩照曉霽倒開瞭錦爛因霞亮苔鮮爲雨澆列眉平對抹出
味怒生標何方覓雨化每日見山樵漏盡鐘聲發幽人意未消

泉嶺

章其志

羣峯羅列一峯尊策杖登臨欲斷魂地勢巍峩天一氣烟光縹
緲水環門罡風不散靈山劫碩果偏畱魯殿存芳草至今銜舊
恨闍黎共道武林恩

白狐嶺八景

釋宏敏

狼籍威音臭味新
臨風嘗惜弄花人
香巖未許從緣入
到此知誰掃客塵

問香樓

微笑春風五葉濃
回看雞足已迷封
水田條相分明在
剪碎烟霞好自縫

架裝岳

稜稜骨氣已空羣
今日中流欲藉君
可怪自呈還自掩
頂門舒卷一天雲

摩雲頂

夢回孤枕鷓鴣殘
春雨蕭蕭古木寒
往事不須重按劍
乾坤請向樹頭看

空花樹

前題次韻

釋傳榮

十二風流曲曲新
聞香誰是問香人
若從此處尋花悟
緣起無端墮六塵

問香樓

茫茫聲息足林煙
猶似聞經意未眠
我與濤松俱一處
不知身在白湖邊

吼烟石

前題次題

釋寂谷

石磴縈紆未易攀
徑行觀樹遂幽閑
主林神恐遊塵度
設險雲中石作關

石門關

前題次韻

饒宇朴

無聲聲徹碧雲開
喚醒烟霞未是雷
即使振衣高座上
空青萬道欲飛來

呼青閣

木樨公案一番新有扣還須善聽人會得拈花微笑旨武陵久
已絕風塵問香樓

鎧甲嶙峋著地濃祇應霧鎖與雲封請看子夜黃梅意輸與盧
公一手縫架裝岳

拋却袈裟獨出羣如來金臂欲摩君嗟峨若向中流見迸碎虛
空幾片雲摩雲頂

古榦浮空掛澹煙寒巖雅稱石同眠臥龍未肯虛鱗甲時作風
濤列樹邊吼烟石

橋水拄來故是疑有無猶被轆轤知何如徹底無些子占得高
峯一座危截菴井

九日偕閔大渾存周生止才暨諸生遊白狐峯

羅荃

佳節雖寂寞遊思轉悠然招我同心人相與造山巔山兮氏白
狐轟轟干雲衢危磴露苔滑層林滄靄扶扶攜出雲根偃僂更
膝捫喘吁憩盤石已覺羣山奔泉峯岌爭長漸嶺伏兒孫汝水
惟沙白貢川一帶分右肩何曠朗百里無畱賞縵繡錯郊原村
炊出草莽鴟張吼烟石噓氣彌霄壤引領望山門俯臨修竹上
摩烟頂未竒截流井堪疑惟有問香閣清幽難議思樹杪看山
色牕櫺窺轂雛呼青兩美合邱壑更多姿幾時斷俗冗來此借
一枝寂然觀本性撫琴更吟詩茶罷風生腋問僧何所適僧引

看袈裟懸岩墮千尺峭拔自山根熊奔虎鬪蹟鷄卵累九碁同人多脅息寧須鄧襄氎直作猿緣壁嶽峯越險艱彷彿鬚綴空隙長嘯驚魑魅居然挾羽翼山靈怒我狂馳雲冒巒岡倏如積薪火又似斥堠張隔手不相見印友亦蒼黃怪此登臨樂猶然不可常造物者何意將以慰淒涼予與周若閔豈曰絆塵鞅牽攀返精舍一一過上方蝕碑猶可讀壯觀耿難忘歸途俄開霽迴望更悒悒

藍津渡夜坐

饒宇朴

月意宜在水晏坐林塘幽今我適河渚皓魄浮中流皎如巖上雪初日相與侔感此景物佳命樽聊勸酬亭亭雲中鶴下視河中洲清唳矯竒翼獨復驚眠鷗翱翔有餘適入表庶清遊銜觴一凝睇稻梁非遠謀

其二

風月耿良夜盛夏如清秋衆籟息繁響曠然消我憂明河淡川上金波彌西流慨然念物序日月各有求櫛山一水間林巒抑何適孺子信達識永懷眷高邱不見讀書臺但看煙景浮高風獨延佇邈哉此前修

晚泊藍津渡贈饒宇朴

施閏章

尋源泝盱水旅泊過江曲春陰暮雨寒孤棹成獨宿寧知潭上村已接櫛山麓之子向夜來餽我樽中綠久客臥南州瑤華復

相屬言詠開羈愁散帖對明燭嬋媛嗟美人胡爲滯空谷肯就
飲東湖一爲洗煩促

瑞洪畱別舒兩水兄

雷 鉉

此生離合豈無由端的如君神可投風阻昔連三日榻雨行今
共一湖舟不辭千里曾過我交耐卅年孰與儔漫道交情如土
棄巋然儀表砥中流

八字腦歌再贈兩水

雷 鉉

八字腦水分流水分流古道畱此去君家只十里我經過此舟
先艤憶昔曾阻三日風披襟送抱忘彼已昨過龍津正望君或
云束裝已歸矣解纜放行至瑞洪一夜輕舟君至止相看驚喜
開懷抱同舟送我八字腦八字腦攜手生人歡分手生人惱君
過七十我六十後生謂我年俱老相見他年憑卜筮努力加餐
善自保

過覺性寺約友

陶開中

平林古寺蝕丹楹遶徑山花不記名前浦漁舟搖泛泛遠峯樵
斧響丁丁風回古瓦聲翻磬月瘦荒簷影煮鑪飲酒匡廬家法
在禪歌招隱寄闕生

過龍安寺懷舊

陳時懋

躑躅當年四照紅板橋溪水漲西東高松坐看綠枝鼠古寺眠
聽繞砌蟲老去臨流情易懶悲來撫墓意何窮一樽酌罷空延

佇風輕雲稀日又中

東岡廟

江 墨

塑像衣冠各儼然濱湖廟食幾經年和風澹蕩時來座急浪掀
騰欲上筵隔岸遙聞鐘渡水疎林瞥見鼎生烟軍山一派茫無
際長伴魚龍夜月眠

棲賢山

江 墨

俯瞰長流百滙川奇峯面背曉生烟當時名士曾爲郡今日詩
人已得仙賈市惟聞朝徇利叢林誰解夜參禪空餘世數天台
小日夕陂湖泛客船

虎拜岡

朱 紱

昔年包孝子事親在華門負米歸中路適與虎相撓曳之入榛
莽自分不復生蹲踞張牙爪眈眈注兩睛包云爾啖我前劫不
可更父母倚閭望誰供藜藿羹再拜乞歸去雙淚垂縱橫虎仍
曳衣去復置舊處行事倘涉誕妄青史何標名一念能感格物
亦通其情紛紛浮薄子何不爲至誠千載慕芳躅漠然山水清
壇石山

朱 紱

環邑皆山水孤峯峙邑中浮雲千里見圓月萬家同花落香猶
在棠高蔭不窮巖巖瞻具美一路沐清風

題舒梓溪先生探梅圖

李 紱

鐵骨冰心兩諫奇文章氣節大江西慇懃寄語探梅者不在西

山在梓溪

泊英山湖

朱徽

一葉飄飄泛水隈汀洲淺浪好縈迴湖光黯落山雲暝浦樹蒼
蒼自遠來

其二

幾曲清流掉桂舫空明遙夏水中天餘暉歷亂寒潭影澹澹風
光入暮烟

其三

直訝萍蹤幾日休片帆今夜宿沙頭荒涼野岸人家少唧唧蛩
聲未了愁

其四

孤嶼荒汀本閤然况兼斜月滿霜天夜深忽聽漁歌唱驚起寒
鷗未穩眠

宿鶴林寺

釋戒顯

路出湖峯野徑紆入門清絕此禪廬疎林疑湧金蕉畫寶藏猶
懸海嶽書松老千山來鳳鶴樓高十里見樵漁招雲醉月多幽
勝好拌閑談半日餘

前題

饒宇斌

山村晝掩禪關靜剝啄何來上客車獅子座添剛十笏鷄壇句
好直雙珠移樽坐久春燈亂解榻談深夜月疎繞屋長松箕踞

穩龍鱗多是別朝餘

宿崇聖寺舊禪堂

饒宇朴

偶來蘭若宿清絕
迴人寰月色光中靜
鐘聲斷處閤窗搖
千个竹閣跨一卷山欲悟
無三教應叅不二關

三寶觀

陳時懋

三寶由來此地傳
翩翩跨鶴不知年
一枰未許隨柯爛
雙劍依然照斗懸
石蹟痕疑雲篆字
羽流瘦似地行仙
夜深白地湖風起
吹送鐘聲到客船

靈雨行

張棟

壇山三春頻苦雨
治水無方效神禹
目今旱魃又爲殃
自愧庸才政失序
嗟彼小民實無辜
旱潦接踵罹此苦
老幼屏車烈日中
僞傷鄰陰觸其怒
弱者呻吟詈不休
强悍搥拳鳴官府
破額碎衣各忿爭
案牘紛紛日旁午
予聞靈泉有神龍
虔禱名山祈神祐
昊天默默憫羣生
一念感格雷電舉
致齋步禱無敢渝
黷陰雲散復聚
斷續甘霖或有無
積誠上孚終難許
越日龍興沛滂沱
郊原霑足羣歌舞
西江惟吾進民淳
四境稱功互相語
豈知仙聖默佑功
片言傳告爾士女
宜修祠宇奉衣冠
不斷晨鐘與暮鼓
從茲聖蹟得昭然
永垂慈照裕進土
莫辭小善當自爲
久行其心還太古
積善之家獲正祥
豈有流離失其所
刑書無復懸國門
焚香且續羣芳譜

張邑侯禱雨麻山應時雨沛集唐四韻以謝

劉肇聞

修容謁神像

劉禹錫

如祭敬亭神

羊士諤

日入林島易

李嶠

風催景

象新

杜審言

陰陽雖有悔

張九齡

膏雨自依旬

元宗同

欲識皇天意

嚴

維

恩沾雨露均

張勝之

縣城偕曲水書院山長龔鳴玉晚步

齊以祖

閒步東郊外三春暮靄濃雨過香谷口帆遠落雲峰伍相千秋蹟梵王此夜鐘濠梁一攜手長嘯倚青松

其二

古人日已遠山水寫無窮九曲源流富三台像應工前村花落暗僻逕草還封誰是後來者知君意我同

虎拜岡

饒夢銘

明孝子包實夫授徒邑之太常里冬日過厚榭遇虎突其前始而伏狀類拜者徐起銜其衣至林莽中釋而蹲包亦對而踞坐語之曰爾虎也當啖吾肉殮於爾吾何恨但吾二親俱七十餘爾能容吾畢吾養乎吾肉可食終還爾也虎乃起曳其衣復至故處舍而去至今稱虎拜岡云

虎食爾何仇不食爾何德孝子有至情毅然臨不測往者林麓

間寒風吹凜冽，俛鬼禡人魂。擲揄躍山側，彼躄此亦踞。毋乃太相逼，子出親心懸。子死親養缺，爾食終還爾。斯言殊慘惻，語虎虎無怒。曳衣俾之去，猛獸有仁慈。所愧非孺慕，吁嗟乎孝如實。夫仁如虎，虎拜剛名。擅今古，安得盡挽弱肉強食之澆風。化作和風吹甘雨。

龍馬坪歌

饒夢銘

宋都統密公佑佐師撫城時，元師攻豫章公帥師接戰。龍馬坪軍陷重圍，揮雙刀出過板橋，橋折被執，誘降不屈。死之先是元人誘其子語降，公叱之曰：爾行乞於吳，但曰密某之子，誰不憐爾食爾，乃言降耶。其子嗣殉難。部將王士鱗亦死黃山，土人哀其忠，瘞尸并立廟祀之。明邑宰黃貞父奏其事得祀典焉。

龍馬坪前西風急，將軍怒髮爭豎立。碧血灑地五百年，行人下馬長於邑。憶昔長驅入寇時，執兵擐甲哭登陴。天運潛移宋祚衰，遂使龍坪重喪師。臣身飛箭如飛雪，揮刀潰圍橋板折。可憐忠勇氣無雙，游魂空污沙場血。有兒不愧先將軍，有士不讓南霽雲。只今骨朽精神在，風雨中宵鬼若聞。吁嗟乎代興代亡元社屋，孤墳獨占玉山麓。春秋蘋藻薦祠官，老褐摩挲尚可讀。乃知大節永不磨，千載澄溪咽寒淥。

和黃貞父棲賢山八景原韻

饒夢銘

農郊晚唱

疑是舞雩遊日夕賦歸去田父解畱人遺音滿林樹
僧寺聞鐘

敲破五更霜鐘聲禪院起山曉夢初回靈臺徹終始
茶圃春雲

香雲飛漠漠香風吹漸漸誰與拭龍團攪却春愁片

書臺夜月

書臺人久空臺空月仍在清風吹夜涼愁予懷千載

筆峯聳翠

翠微自何年天然聳健筆我欲賦凌雲峯頭雲正集

帶水送青

溪隨山路轉山曲水如帶清風水面來自拭山眉黛

寒沙泊雁

秋風江上寒雲際呼朋侶莫竟望衡陽且息蘆花渚

暖谷鳴鶯

不知幽谷暖習習春風生及時快遷喬且自和其聲

癸巳九日齊西州招遊烏石嶺

用杜少陵
藍田韻

薛濂

烏石嵯峨四望寬風高九日喜追歡苔封石徑遮芒履藤挂丹
崖絆竹冠厯落邨墟煙外小蒼茫草樹日中寒香山擬伴龍山

與坐對泉峯帶笑看

曲水書院觀漲示諸同學

管

嵩

蘇州吳縣人

鴨頭濃泛雨餘天九曲瀾迴落檻前拍岸萍花紅乍洗牽風荇
葉翠相延韻餘點瑟聲鏗爾文喻韓潮氣浩然潑潑真機從領
會一竿閒對夕陽邊

七日同人讌集三摩菴

管嵩

夢回桐葉鳴珠瓦似遣涼颺送殘夏朝來急足打門迎聯轡城
西爭縹馬東道欣逢德祖賢中林布席依蓮社大興楊君治具招客荷香
拂拂襲人裾竹翠娟娟露微瀉披襟雜坐閑揮麈容我詠諧便
疎野十笏初開憶昔賢停驂誰是優游者庵前明邑宰黃公汝亭建後遂為送迎總

息地燕吳楚越總天涯萍梗相逢臂欣把却憐檣楫有征人

俞岐山邵

共暉命

權將行更奏新聲催玉笋離合無端去住同當筵倍覺愁心惹

頻年天上數星期回首家山意難寫曲罷真疑薛訪謳欲屈名
倡傲謇姐不惜畱連倚醉聽生平莫樂相知雅落月高樓銀漢
橫風燈爍爍蘭膏地

千佛庵

管嵩

五里城南一簣峯隔林遙聽午時鐘閉門千佛歸心印敲枕三
春落澗松閒伴鶴雲消旅況又隨鴻雪寄游踪重來裴迪溫經
處半榻龕燈映我容時有同學寓讀庵內

崇聖寺毘盧閣登臨

饒宇朴

開軒空碧落結宇駕青疇石磴袈裟古松風鐘磬悠水光遙作
鏡曙色欲歸秋不盡登臨興還期策杖遊

白狐峯二首

釋戒顯

盤屈松陰路孤峯聳獨尊畫圖如百鑑烟水足千村古殿垂神
發寒濤吼石門雲中龍象窟笑兀一乾坤
梵闕凌空起疎鐘度遠沙田衣畱怪石靈樹發空花青翠千山
送江湖一望賒聞風如可御吾意欲乘槎

白狐峯

章兆瑞

不辭九折復尋山聞是靈源憩此閑空樹畱花長潏潏神泉截
水益潺潺松鳴絕壑僧歸晚月照孤巒寺影闕夜久梵音增寂
歷摩雲頂上可忘還

介岡八景

饒宇朴

桃花岩畔曙煙生望入空濛繞岫輕侵曉好尋高士夢青峯數
點一江橫

楸山曉煙

清宵樽酒對遙天一水接藍意渺然五夜月明羣籟息晴波潏

灑玉生煙

藍津午月

三春草色砌荒洲地入菰蒲雪浪浮昨夢小舸湘水上君山淡

映洞庭秋

青洲長漲

杖藜飽看一峯雲暮靄朝曦總不羣誰信春風工寫黛和煙和
雨幻氤氳

白嶺春雲

不鼓微風浪亦排蒼波翠巘自滌洄忽憐石上孤桐好爨下當年棄此材石鱗迴瀾

莫將春飾惱秋容廿里霜林絳雪封稠花密蘂胭脂麗可關深紅關淺紅栢林紅葉

天清鶴唳晚山空竹浪松濤冷梵宮入夜鯨音吹不斷乘風繚繞月明中鶴林晚鐘

先廬嘉樹澹秋林一片明霞入座深日暮微吟籬菊句花光山氣昔人心菊莊夕照

前題次韻

饒 植

何處霏煙逐曉生峯高嵐影度江輕伊人慣助山川色莫訝吳

門匹練橫楮山曉煙

水映空青月在天月涵天影水依然清光若爲閔情放夜半星河動曉煙藍津午月

平鋪藍水上芳洲雲氣疑蒸夏日浮江色粘天人倚檻眼前青接蠡湖秋青洲長漲

衆山不碍嶺頭雲住此應爲鸞鶴羣誰道山居人寂寞翠屏丹嶂互氤氳白嶺春雲

莫疑島嶼費安排水愛澄潭迴復迴却憶桐根餘石骨濤聲似識嶧陽材石罅迴瀾

九秋誰爲轉山容霞起疎林遠近封栢葉也酣霜氣色村莊隨

處發深紅 柳林紅葉

夜闌寂歷響高空鐘呂何須說變宮恰喜儒門收拾佳聲聞證

入梵幢中 鶴林晚鐘

廿年風雨度長林共坐東林不厭深果有餘霞散成綺詩成遙

見古人心 菊莊夕照

雷溪訪章天來

饒宇朴

幾日消孤寄尋君眼乍明論文虛舊業閱世見今情花覺芳林
爛秋看一水清龍紋飛兔在堂構好經營

饒蔚宗至雷溪見訪有贈因和其韻

章兆瑞

不論升沈事居然意氣平花繁隨夢蝶酒熟聽啼鶯落算小兒

子舉麋隻弟兄何憂堂構拙大匠荷生成

招饒蔚宗赴雷溪

章兆瑞

車音莫惜枉槃邁況值清秋景物和日暇朋儔惟聚好家貧盃
芽豈能多聞雞欲踐遠遊約看菊何妨款步過騶從倘煩問前
路遶門溪水聽鳴珂

章天來以詩招赴雷溪却和

饒宇朴

爽色遙分出澗蕩寒山還挹緒風和籬邊菊老秋光瘦江上楓
青客思多樽酒素心虛屢夢六詩清興肯頻過攜琴今日緣溪
去流水聲悠動玉珂

宿鶴林寺

陳允衡 盱江

喬松修竹圍禪院客到清陰落日初龍象莊嚴前代跡樓臺縹緲化人居長廊積葉因風起曲澗新泉得雨餘且喜眞僧能下榻頓令心病欲消除

登白狐峯

章兆瑞

攀蘿捫石扣禪關處處青山不解顏惟有望湖亭下水澹雲晴日與人閑

聶侯鍾陵書院落成

章兆瑞

吾道由來星日明有宋濂溪亦紹成師哉大雅重嗣響五百年後堪與京光風披拂振枯落又兼霽月照人清鸞旂箴噦來戾止小大從公絃誦聲纍纍善政屈羣醜更化況逾十載久瞻依祇賴片席畱召棠羊碑同不朽憶昔作者空同李噓植多士如雲起鍾陵邇者漸榛蕪有德有造從今始固知課最璽書迎曳履直上星辰行吾儕躋堂歌思服稷祀還與元公并

九日遊白狐嶺詩

龔元价

南昌人

佳節不能嬾狐峯風景壯結伴到陽岡危途屹相向跼步綫縷間調氣屣屣上東南互羣山嵯嶻排儀仗西南羅遠岫叢歸互揖讓幽邃入山寺差池踏雲嶂佛旁款古井茶次閱經藏諸龕根崔嵬間香獨高閣檀欒修竹潤嘲啞山禽唱到處耳目移袈裟尤莫尚穿林轉峯巒度暗忽空曠虎豹奔突下虬龍盤拏傍

一作虬龍夾青天虎豹奔幽壙

歷歷原野逼遙遙湖山亮從來慕桃源今日造

瀛閭夕陽幽討徧歸途肢體暢劇飲花月筵猶覩英精王慨然
想天地勝迹何時創同遊怖險阻昔賢昧搜訪乃知寰區內何
限靈異狀顯晦自有時詎獨一雁宕冥心想神王搗筆代畫匠
流傳龍山徒齊窮要妙望

戊申花朝前一日招同鄒竹軒齊寓陽兩廣文孫介堂謝
壽亭兩尉陳觀察同年遊福勝寺千佛庵展謁鬻宮歸途
小憩敝署喜成三律以紀雅遊

魏攀龍

東來行部趁晴天禮數寬時屐齒聯節近花朝香繞郭居畱玉
版古參禪萬歷黃貞父邑合構玉版居掣閤茗椀消清福引勝旃檀結靜緣

日事簿書塵碌碌追陪郊外便騰騫

沿緣城北繞山南古木叢深又一菴數不分明金設相歆成馥

郁篆浮龕定心豈逐風旛動

一僧云旛動一僧云風動佛云居士心動

清官宜兼慧

業參歸路斜陽光頻壁摩宮規制領鴻談

文明門左反肩輿珍重文星照敝居露冕和光明畧分擘窠古

額荷延譽讌談統屬循良要盼睐寧教譜誼疎可奈轉輪程限

促春風報曉戀干旛

觀察時赴五福督運軍需

畱別進賢士民

王泉之

憶昔宰鍾陵正值歲之暮除夕縮銅章元日投劫訴擔匪蜂蟻
屯嘯聚鄧家鋪號令走邊錢白挺如蛾赴折匪以一錢分爲兩半以五色絲繫之半

為坐令半為行令有事命老滿頭持行令半錢招之羣匪皆集矣 鄉曲侈橫行紅黑兩線布日

為紅線夜 何物蕭爛脚跳梁成巨蠹分肩踞綠林擔匪因分肩而各並非挑

竊為黑線 何物蕭爛脚跳梁成巨蠹分肩踞綠林而各並非挑

販私鹽者也大半皆賊一肩為老大二肩首傳令三肩首執棍

自二肩至十餘肩不等每肩或數十人末肩為老滿肩首即老

滿頭年壯 居民相震怖環城肆擄掠官長若無顧白晝搶罪囚

而善走 逍遙脫禁錮余為民請命除暴乞當路羽檄委員弁一一歸搜

捕懲辦百餘人費金計萬數前令死官衙虧倉又空庫約計九

千餘虛擔實錯誤土瘠復民貧奏銷每失措積欠年年增何由

征新賦民得高枕眠官日成恐懼所幸醜類除止意吾固固孰

測意外憂鄰境生變故餘干朱毛俚謀逆風聲露稱號積善菴

偽封廣招募大憲新政行保甲急先務因之嚴稽查適與邱賊

遇檢獲腰間物龍票兼逆句亟報大中丞赫然生震怒飛章達

天庭移節玉亭駐文吏與武職奔走後先附我奮不顧身探穴

趨若驚激義憤同仇那復計讒妒渠魁匿入閩餘黨無逸免而

月悉就擒疾風掃秋樹入告 喜天顏幸將微勞註頭銜忝復

新 厚恩心版鑄摘發小臣分安敢希進步豈知室磬懸公項

終無具道款例鑄職無術救僵仆調劑動憲心忽發芝陽諭祇

謂慶安瀾一葉蠡湖渡惠我西江水蘇我涸轍鮒鵲巢而鳩居

終非安樂寓伯也我怨言姜氏終驚寤針氍坐年餘嚼蠟了無

趣剗肉為醫瘡此挹而彼注窶人冒富人何曾得寬裕波濤夜

夢驚儼同抱薪厝我懷素坦白於人有何忤讀書報 國心突

忽廢沈痼七年艾難尋徒深飢渴慕霍然逢和緩金針喜暗度
勺水起風雷驚蛟得雲雨長歌寄鍾陵舊廬難再住士當美文
章組織親師傅民當睦宗鄰守望勤防護嗷嗷者啼饑誰復予
爾哺慄慄者號寒誰復暄爾煦一字一淚垂須知余心苦馬坵
塘汎碑毋使塵泥汙

送別徐鹿苑

迪惠

邑侯四首

有序

黃

麟

昔魏用晦令吳縣去之日或繪山川以送魏屬序於友人
爲紀其事豈不以芳草多情垂楊增感空桑一宿履印低
徊流水再彈琴徽往復行者之戀戀於居人其亦猶居人
之戀戀於行者乎明府徐鹿苑先生青衫籍久赤牒符新

生本玉堂之才來作郎官之吏越以己卯首夏署篆茲邦
魯恭之莅中牟野畱馴雉王喬之居鄴水闕有仙鳧甫及
期年翕然就理迫於瓜期遂爾言邁行旌移乎花縣祖帳
盛於郊關別泪盈懷離情滿幅甘棠蔽芾召伯之所夙經
隰桑婀娜崇陽之所隱戴民之愛之如慈父母焉麟以竹
柏之契倡爲河梁之篇一時屬和者欣欣合情喈喈均響
抽其翰藻鬪厥心聲不數日得詩若干繕呈明府亦畱詩
四章而去迢迢琴鶴是趙抃之行裝疊疊縑緗亦吳山之
故事他日仁風載扇甘雨隨車兒童竹馬之吟父老青錢
之贈其以此爲嚆矢也夫

郊餞詩

黃麟

一載巖封借寇恂，衢歌巷舞遍城闈。
時清最是循良重，官好無妨晉接頻。
蓮幕風高花正麗，琴堂日永鶴俱馴。
我來欣見甘棠蹟，仁愛廉明字字珍。

銅章簇擁下車初，拯敝扶衰政可書。
村柝夜傳雞犬靜，蒲鞭朝挂網羅疎。
一奩冰鏡呈肝膽，四境桑麻植井廬。
恰好板輿花下奉高堂，贏得笑顏舒。

大夫官職重，與賢薦鶚秋。高八月天一邑材，華公醞釀滿城科。目士聯翩東山出，本蒼生賴葉尹飛。宜赤子憐幾度攀轅，畱未得匆匆離緒到寒氈。

入座蘭言愜素襟，空齋風雨訂知音。
本來甘苦名場悉，大半生涯故業尋。
官燭傳箋蓮漏靜，仙盤酌盞藕香深。
只今萍跡東西判，衣帶盈盈兩地心。

將發鍾陵畱別詩四章次黃杏帘學博麟韻

徐迪惠

習尚敦龐人自恂，萬家恬謐接重闈。
琴鳴壇石風徽遠，錦試鉛刀淬厲頻。
敢擬玉壺冰貯潔，難邀桑畝雉來馴。
行舟載得多情重，華翰清詩拱璧珍。

憶昔羣編卓犖初，未諳錢穀與刑書。
催科不擾時形拙，滋蔓難圖意恐疎。
民克心臧勤土物，士循義路樂蘧廬。
仔肩暫息無他

累吹袂風輕任卷舒

閔披邑志溯前賢武緯文經煥斗天臺鼎當年光史乘科名今日復聯翩笙簧秋宴覘儀羽童冠春遊劇愛憐多士欣逢君作範寒牕不慮坐無氈

湖山如畫豁塵襟盡日垂簾喜足音泮水波澄環九曲槐山香

靄列千尋師資一字觀摩善兄事三人繫念深予與杏帘學博獲麗澤之益邑

多君子皆潛修勵行室邇人遠予甚企之膠漆性情泮水跡芝蘭氣味別離心

送長女之壻萬本西陽官署

舒徐氏

忍淚不敢下恐兒心更傷別離當老病骨肉遠他鄉語盡意不盡路長情更長願言佐夫子報最擢循良

雷岡徐母王孺人割股詩歌

樊恭偉

骨露股肉泣釜救姑當甲午孝婦年廿五姑畱年苦短姑逝心苦長勗夫讀凜姑旁傳兒經坐姑堂夫名兒名著縣庠學姑儉荆釵香學姑恤鄰糠餅嘗廿六姑亡如未亡庚申仲冬母病極兒婦請訓侍堂北療姑苦情聞未得浴身以就棺臂痕尚未完婦疑問兒兒問父父曰有之戒勿露兒婦泣不曉其故嗚呼母行當請 朝廷旌母心不願千古名鍾陵口碑傳母久生王適徐培植厚五子衆孫環左右五十一年終無咎我歌孝母兮芳名凜凜傳不朽

水災詩四首 有序

舒煥杰

進賢北鄉地濱鄱陽多築圩成田乾隆甲申以後巨浸爲
災連遭九載奇苦萬狀人多逃溺非目睹其災身受其苦
者卽率籲而出矢言亦且聞而不信杰圩鄉人也親歷其
境心傷其事感而有詩非敢忍言灾祲亦聊以備古太史
之采陳云爾

水灾緣起

西江稱大澤旣滯曰洪都章貢從南來奔涉千里駢左會漢江
水右來信江俱彭蠡乃滙澤衆流仰傾輸傾輸在湖口湖口本
如壺邇來滄桑異清駛多汙淤古云八里江今者成修渠一潰
承萬派何以大消除自從君灘年歲在闕逢初後先三十載沈

浸幾歲無秫稻餉河伯聞舍生菰蒲荼苦不可狀所狀吐仍茹
我欲丐仁人從教桑落疏疏潢達江口靡使成沮洳沮洳盡宜
淪豐年咸黍稌溇陽抵八里江一帶若桑落洲等今皆沙淤八里江不一二里矣所以下游水不能宣洩使連郡多有水灾若干冬間疏三五小潢通流傍多作埧口待春夏壅水冲決必能深濶一二年中卽可使江口復舊今長官能賴此舉澤被生民罔不成賴功德無量而熾而昌矣

決圩

洪州半湖泊資圩乃成田圩形若城堞百里相盤牽就中聚村
落曖曖多虛煙畫畎紛錯繡所憑在圩堅金甌豈可缺玉環賴
長圓乃如膠續絃又若泥爲圈膠泥滋以水其潰誰能全三月
湖雨連桃花水漲天瀾漫逮夏五巨浸淼無邊邛都有漏天此

時宛同然霑霖靡晝夜萬雷鳴濺濺歛爾報圩圯鼓鉦聲遠聞
有如城欲潰瞻落心熬煎畚鍤雨中聚篷蓑盈萬千或爲泗水
入或爲抱樁前誓填精衛石那惜此身捐豈知土防川川壅土
難填不見泰山石玲瓏多溜穿況復久泥滯墳壙如沙鹽一決
不復理萬頃歸淵潛芄芃青禾塵靄靄黃雲阡霎時皆蕩盡廬
舍又沈淹有時風猛起濁浪如山鶩蓬茆悉淪沒大厦咸傾顛
浩浩天吳騰無舟耐可拏萬家隨逝水淒然逐浪仙此境本親瞻
言之慘且憐所願在官者視如已溺焉

逃荒

蕩析思離居古云罔定極廬舍旣漂零妻帑仰天泣本非秦戟
士頽然雨中立詎擬晉翳桑欲炊無半粒水面倚浮沲全家將
汨沒大哭出門去去去尋安集小子尚乳臭出債無恩卹大兒
甫髫齡豪貴供奚役老妻嫁不售少婦將他適亦有甘餓者誓
死節不失寧爲覘與尼休儕媵和姑父子不相保遑問諸弟姪
一日割恩情生離成死別哀哀億萬人喪家狗求食何時水落
川嘉禾遍下濕爲歌采菑詩羣然復邗邑

散賑

鄭俠圖流民苦教目擊耳方今崇守令沈災豈容諱況值 聖
君世民瘼念不已一朝飛 綸音大吏乃承 旨委屬驗災稜
漫漫天拍水天濶水無岸微茫辨閭里破屋少煙炊檐牙作階

肥人從屋上行見吏檐頭跪萬家等漂泊一貧真若洗乃上魚
鱗冊沿家驗食指入口舉噉噉大半飢溺死所餘盡溝瘠呼名
病難起豈知狐鼠毒未賑先求賄掾吏需冊資闈人取門禮
恩膏雖廣沛無乃血狼齒我思汲長孺矯詔輸困米亦若富鄭
公築防縈居止古人幾循吏至今歌樂只愛古不薄今胡爲風
靡靡豈知惠一人行當膺福祉如茲億萬命伊功寧小擬我爲
作此歌欲俟采風史陳詩如列圖願以獻 天子 圩堤連年災
決皆成卑壤
卽不能疎通河口若大發帑費圩面加高數尺培厚數尺一勞
永逸無煩再修雖有如前之巨浸不能爲害民可使富官不催
科官民兩利
此美舉也

北鄉圩堤自乾隆甲申以來多被水災至道光元年辛巳

進賢縣主朱公藻庭楣大捐廉俸督民修築俾圩高厚連
年春漲他邑圩堤盡被水沖決唯進邑北鄉圩堤皆保全
杰與感德因詩以志其事

舒煥杰

萬頃洪流市地來良苗新種盡成災修堤十里爭傾潰荷插手
人預護培喜有星楂趨迅速更無波使敢遲回先時保固成高
厚況是分廉遣役催

雨漿夷猶風幔羅一舸艤眎漾迴波天吳斂迹游雲淨海若潛
蹤濁浪和潔已原同魚產釜弭災真使虎踰河連年禾黍芘芘
盛應比文翁擢異多

進賢縣志 卷三十五
上巳後五日千佛寺看牡丹同賀蔗農太史作

朱凌雲

尋花勿遲遲看花勿草草城南浮屠寺千佛滌煩擾春色縈花
臺鼠姑燦麗藻昔遊祇樹園檀口開尚早今日天氣新龕舍異
香裊姚黃與魏紫護花倩靈鳥別有冰玉姿銀粧獨皎皎一樣
花中王濃淡各娟好貴品不自知禪關待春老阮郎青白眼未
必盡分曉老僧進客觴盤餐足輒飽酒酣發狂歌花神答幽杳
乘興歸去來山光轉迴繞翹首望修竹夕陽挂林表

附錄

進賢公署

來三聘

郭煙岩霧雨霏微曉坐山城自掩扉黃鳥愁從雲外語天桃
恨向雨中稀他鄉春色違官況寒食東風怯客衣殊愧簷前
雙燕子花期猶得舊巢歸

鍾陵市道中

陳陶

原隰經霜蕙草黃塞鴻消息怨流芳秋光落照見麋鹿南國
異花開雪霜烟火近通繁瓠俗水雲深入武陵鄉曾逢齧缺
話東海長憶蕭家清玉牀

軍湖書院次楊仲宏范德機聯句韻

滕玉霄

春霽名園久未厭花時人事欠雙全彤墀空有三千字白髮
虛過六十年案上詩翁裁碎玉鑪邊茶使吸飛泉萍踪浪蕩

天涯遠那得重來下榻眠

嵐湖晚眺

王芳焯

蘆葦州邊一漲通菱荷香送晚來風重湖遠樹連雲綠斷岸
餘霞映水紅小艇幾人如乘駛同鷗數點欲浮空烟波十里
平於砥絕似輞川圖畫中

南溟寺木蓮花

王芳焯

小苑牆圍古寺東木蓮花發紫金叢香添寶閣爐薰綠醉壓
瑤堦酒暈紅九品臺前楊柳露三生石上芰荷風卽今結得
陶潛社何必廬山拜遠公

